

四庫全書

子部

欽定四庫全書

子部

古今事文類聚遺集卷十五

詳校官中書臣沈颺

侍讀臣孫球覆勘

總校官編修臣王燕緒

校對官編修臣盧遂

謄錄監生臣施華

欽定四庫全書

古今事文類聚遺集卷十五

元 富大用 撰

路官部遺

司法

此下補外集司獄之後

歷代沿革兩漢有決曹賊曹掾主刑法歷代皆有或謂之賊

曹法曹

隋唐更革

與司戶同

唐掌律令定罪盜賊贓贖之

事宋沿唐制諸州置司法叅軍掌議斷刑品同司戶紹興

三年權行減罷後復舊

羣書要語官有決平之司無舞文之過

杜牧行楊元改
充京兆府法曹

制 叅法律曹

胡文恭行
朱遠制

往司三尺之律初有半通之論

詩句幕下風流法曹掾

楊誠齋

袁州司法多無局日暮歸

來印幾窠

古今事實

古義決獄

張湯以兒寬為奏讞掾以古義決疑獄湯甚重之

用法平正

後漢郭洪為潁川郡法曹掾治獄四十年用法平正郡
內比之東海于公

斗南一人

狄仁傑字懷英為并州法曹親在河陽仁傑登太行山
及顧見白雲孤飛謂左右曰吾親舍其下藺仁基曰狄
公之賢北斗以南一人而已

民歌佛子

尹正義為澤州都督府法曹百姓歌之曰前得尹佛子
人為理丞

裴遵度志氣深厚敏機鑒達以門蔭累授潞府司法時
年已老亦為人所知授大理寺丞剖判州獄理行始著
為政寬仁

徐有功累轉蒲州司法為政寬仁不行杖罰吏人感其
恩信遞相約曰若犯司法叅軍杖者必斥罰之由是人
爭用命終於代滿不戮

莅事明濟

顏杲卿字昕為遂州司法叅軍性剛直莅事明濟嘗為
刺史詰讓正色別白不為屈

使域請代

狄仁傑為并州都督府法曹鄭崇質母老當使絕域仁
傑謂曰太夫人有危病而公遠使豈可貽親萬里之憂
乃請代崇

豪縱按治

韋湊遷揚州法曹州人王神爽罷仁壽令豪縱數犯法及通貴戚吏莫敢繩湊按治杖殺之遠近稱伏

斷獄平恕

韋仁壽大業末為蜀郡司法書佐斷獄平恕其有得罪者曰韋君所斷死而無恨

疑獄口對

杜佑嘗謁潤州刺史韋元甫元甫未之知也他日元甫有疑獄不能決佑時在傍元甫詢於佑口對皆其要元

甫奇之奏為司法

與太尹爭

公為京兆法曹日伏階下與太尹爭是非太尹屢黜已

見

韓愈誌
董溪墓

議貸固爭

齊澣調蒲州司法叅軍有父子連坐論死者澣曰條落
則本枯柰何俱死議貸其父太守不聽固爭卒原

舶貨不售

杜純字孝錫終兵部侍郎為泉州司法舶商歲再至異貨山積吏私與市幸不誰何舉郡吏爭與市惟純不售一毫人亦莫知後事發逮獄而純不與

遇事不屈

蕭敏之辟襄陽司法府捕強盜陳大漢十三人不獲鄉民羣行適符其數巡尉執送官不堪笞掠皆誣伏公約法疑之白帥移獄已而獲真盜闔府嗟異禮侍陳楠來守公遇事爭辨不屈楠嘗曰司法突兀長身他日真御

史也

議獄含情

賈易字明叔調常州司法叅軍自以書生不閑法令每
議獄唯求合於人情曰人情所在法亦在焉訖其去郡
中稱平

議事守正

楊龜山先生授處州司法燭理精明曉習法令有疑獄
衆所不決者皆立斷與郡將議事守正不傾

任情不從

李承之字奉世為明州司法郡守任情縱法人莫敢辨承之獨執不從守怒曰郡掾敢如是耶承之曰事在公自斷可也若在有司當循三尺法守憚其言

奉公不苟

傅忠肅公察字公晦公任青州司法叅軍徐處仁余深繼守青州徐長於治民屢試以事知其奉公不苟

從游伊川

馬伸字時中初元祐學有禁伊川之門雖宿從游者以趨利叛去公求為西京法曹銳然為親依之計先生初以非其時恐貽公累公執贄凡十反愈恭先生歎曰此真有志者引而進之自爾出入凡三年公暇雖風雨必日一造焉

見知東坡

東坡守錢塘毛滂澤民為法曹公以衆人遇之秩滿辭去是夕宴客有妓歌別詞云今夜亂山深處夢魂分付

潮回去公問曰此何人所作答曰毛法曹製公語坐客
曰郡僚有詞人而不及知軾之罪也翼日折簡追還留
連彌月澤民因此得名

不識一面

晁詠之字之道補之從弟也為揚州司法叅軍未上蘇
軾知揚州補之以詠之詩文獻軾軾曰有才如此獨不
識一面耶久之詠之具叅軍禮入謁軾下堂挽而上之
顧謂坐客曰此奇才也

事
答

名聞天下

曾鞏游太學歐陽見而竒之自是名聞天下調太平司法叅軍召入脩史館書籍

古今文集

雜著

真州司法廳壁記

劉漫塘

漢太守自言奉三尺律令從事今司法叅軍則奉三尺律令以與太守從事者得其人則政平訟理善人勸焉

溼人懼焉易則否其所繫何如哉而位乃在諸曹下妄庸男子朝入吏部籍莫注一民曹而來則如積薪然後來居上法曹雖已一再更或舉者已貴輒俯首下之何哉法者聖人所重而用法非聖人之得已惟法者聖人所重故官必取於已試惟用法非聖人得已故位不先於同列雖然此一說也抑有遺說焉且法曹所與聯事合治者非刑曹錄事乎又其上非從事與守若貳乎錄事多典右獄則與刑曹均獄掾耳獄掾以獄之成上于

府法曹曰未也則獄掾亟抱具獄而治之雖甚怠敢莫較法曹差獄之麗于上府從事與守若貳曰未也法曹則持之堅辨之力曰當是也乃已守若貳雖甚毅莫能奪夫以一府之所是莫能勝法曹之所非一府之所非莫能勝法曹之所是則法曹之勢張甚夫翕而張天之道也獨法曹乎哉真為池州地褊而民淳歲斷獄視他州絕少故法曹事甚簡才者無以自見不才者無以自勉比年城日加闢地日加重事日加煩從事雖甚敏莫

能勝則選法曹左右之友人趙用之宗籍之英士林之秀以才辟置足以大其官而悵前乎此名氏不著乃稽故府得某人以下若干人將刊置壁間以某昔嘗濫巾焉俾為之序故為力言是官所繫之重使來者知昔之位著為不苟而不敢卑其官今之權任為有加而不敢怠其事云紹定改元五月記

古詩

送趙司法

唐子西

休沐猶坐曹伏日不歸屨平生熟大法餘事工小楷自
稱霹靂手作縣真癩疥鮑宣雖強項臨事中實駭二子
罰自視此理須少戒

律詩

送平江趙法曹

劉漫塘

金科天上耿星辰丹筆年來有屈伸子去平反供母笑
民知寬大頌君仁祇今茂苑題輿客曾是瓊林合席人
若問殘生煩寄語扁舟長占五湖春

贈甘法曹

張于湖

北岳仙人汗漫游，斯文曾到海邊州。
誰怜詩禮甘公子，牢落青衫向白頭。

贈黃法曹

張于湖

吾友黃升卿，乃是天下士。
一官法曹掾，整整老胥忌。

詩話

觀梅動興

杜詩東閣官梅動，詩興還如何。
遜在揚州師，云何遜梁

時人孫云何遜作揚州法曹廨舍有梅花盛開遜吟詠
其下後居洛思梅花再請其任從之抵州梅花方盛遜
對花彷徨終日見東坡王定國倅揚州詩註

司戶

歷代沿革漢魏以下有戶曹掾主民戶北齊以下與功
曹同隋有戶曹叅軍文帝時為司戶叅軍煬帝為司

戶書佐唐開元復為戶曹叅軍掌戶口籍帳婚姻田

宅雜徭道路之事

在府為曹
在州為司

梁開平省六曹掾屬留

戶曹一員通判六曹宋沿唐制諸州置司戶叅軍掌

戶籍賦稅倉庫交納

通典分紀聖朝職略四朝志

元祐令中州從

八品下州從九品乾道六年汪大猷乞令司戶專主

倉庫

羣書要語曹羣也戶曹民所聚也

韋昭釋行

祠曹賦籍之要

司

白集行李玳京兆尹戶曹制

以三語自試

詩句桂林戶掾舊能文

楊誠齋

才華汝尚為丞掾

王介甫

三

語又為掾大家聞屈聲

古今事實

元素清吏

張元素仕隋為景城縣戶曹竇建德陷景城執將殺之
邑人千餘號令請代曰此清吏殺之則無天也

七品要官

李素高祖令授七品清要官所司授雍州司戶上曰此
官要而不清

河東三絕

唐徐彥伯改蒲州司兵時司戶韋嵩善判司士李巨工於翰札而彥伯以文詞推美時人謂之河東三絕

素有仁愛

裴守貞父謹隋大業中為淮安司戶叅軍屬郡人楊琳田瓚等亂惟以謹素有仁愛故賊約其屬無敢害護送謹及妻子還鄉

宗旦罵賊

邕州司戶宗旦常白知郡陳珙言儂智高必叛珙不聽

及城陷宗旦媢罵賊被殺

號念珠曹

京北戶曹月俸一百八索號為念珠曹

謂霹靂手

唐裴琰之為同州司戶年少刺史李崇義輕之州中積年舊案數百道崇議促琰之判琰之命書吏數人連紙筆須臾剖斷並畢崇義大驚曰公何忍藏鋒以成鄙夫之過由是大知名謂之霹靂手

南山判

李元紘遷雍州司戶時太平公主與僧爭碾磑公主方承恩用事百司皆希其旨意元紘遂判還僧寺長史竇懷貞大懼勢促令元紘改判元紘大著判後曰南山可移此判終無搖動

作歡喜詩

杜審言為吉州司戶武后召見將加擢用問曰卿歡喜否審言蹈舞謝恩因作歡喜詩甚見稱賞

分紀

作措大官

蜀王宗銖責授雍州司戶叅軍問吏曰叅軍何官衣何服吏曰下州判司綠衫槐笏而已宗銖大笑絕倒曰若頭便斬去吾何能作措大官耶

元國志

官至司空

後漢陸績李邵皆仕郡為戶曹吏邵官至司空

詔為御史

韓思彥為州司戶上召問不見卿久今何官思彥始道

所以然上謂宰相曰此亦大屈詔為御史

不行鞭罰

韓思復改汴州司戶仁恕不行鞭罰

不事儀矩

李之才字挺之任孟州司戶挺之坦率不事儀矩時范忠獻頗不悅挺之自若也後忠獻建節移鎮郟寮送至境外挺之但別于近郊未幾忠獻謫守安陸過洛故吏無一往者獨挺之沿檄往省之忠獻始稱歎遂受知焉

言行錄

商確古今

洪文惠公守徽州時范石湖為戶叅洪公博洽精明公由此究心吏事洪公喜日與公商確古今常曰吾視君齒必至兩地君其自愛

共稱文章

曾鞏初為太平州司戶守張伯玉前輩人也歐陽公王荆公共稱子固文章伯玉殊不顧問語子固吾方為六

經閣其為之記子固凡謄藁六七終不當伯玉之意謂子固曰吾自為之則曰六經閣者諸子百家之書皆在焉不書尊經也子固始大畏服益自勵於學矣

同上

試為校理

晁補之字無咎王安國一見而奇之為澶州司戶叅軍

召試為秘閣校書

東都事略

除太學正

蔡肇字天啓長於歌詩為明州戶掾除太學正

事略

古今文集

雜著

河南府倉曹叅軍廳壁記

梁肅

倉曹掾祿秩位次載於甲令在漢魏間與叅軍事其職各異五府及州郡皆有其官北齊天保中又授叅軍以繫官曹之號蓋取夫以文吏而叅武事隋由之國家亦因之河南府領二十六縣為主東郡環地千里邦畿之內征賦之入凡蓄聚之物皆於其司一都之移用郡吏

之稍食又出焉故其務殷其事積常為他曹劇居之者
不勤則廢不廉則敗不明則耗乾沒之患生其職或擢
居南宮及御史府故有司常綜其名實攷其功緒然後
授伊陽張君閔鄉李君今竝為其官李以貞固稱張用
文敏著予謂命官之職事與二掾之才美不可以不紀
遂直筆書之其兩曹位次與前政名氏端如貫珠列于
記之左右

送楊子聰戶曹序

歐陽脩

士之仕於州郡者必視其地大小高下之望以為輕重
河南大府也叅軍雖卑以望而高下之固與他州郡異
矣然地大望高居者皆將相名臣吏民間坐而偶語道
某將某相某官者常名斥而一二歲數之至於郎官御
史方鎮牧守使人貴客由河南出者入不候於疆去不
餞於郊途逢而不避市坐者不起豈素慢哉蓋其見之
習也彼視公卿大臣要官其易如此矧所謂叅軍者邪
其不羣嘲而隨侮之幸也叅軍每上府望門而趨吏摩

以肩過不揖反就焉持刺執版求通姓名雖心負其所
有欲進自達不可得其勢鬱鬱卑且賤反甚於他州郡
故為之者未嘗樂也然其間能自以頭角頎然而出者
鮮矣其才難之美非有異乎衆莫能也戶曹叅軍楊子
聰居府中常衣青衫騎破虎鞞出入府門下人固輩視
而槩易之居一歲相國彭城公薦之集賢學士謝公又
薦之士之有文而賢者盡交之其能出其頭角矣若去
而之他州郡不特頎然而出矣遂特傑然以獨立也子

聰南人樂其土風今秩滿調於吏部必吏於南也吾見南之州郡有傑然而獨出者必楊子聰也

送蔣司戶之官饒州序

洪邁

凡叅軍事于州者率不減四五員司戶蓋位法曹上而常與錄曹通職連事不頗決故初策名者輒調焉最閒且清上官指為無所事臺符府檄交午道上至局局奔命不暇敢寧厥居以車為家以官舍為傳舍士大夫平生數郡縣吏能否從二千石下洎尉某賢於某若干低

昂卑尊獨不及司戶非擇而議焉實固然也夫建置一官非苟而已司戶雖不當位然訟獄之平亭倉廩之入出庫錢出自幾何或受奉于糧料者與實不相應且當與聞之是其在一郡不為薄能敬吾職亦足稱善吏指為無所事不可乎丹陽蔣君別其親大夫公子贛將司戶吾州其為人清慤介彊飽學問自輔正十此官猶辦有餘力前之云云雅非為君設也予家番城中薄西北邊有園可十畝竹樹池臺致足虞樂再歲於是歸心

日東馳暇時儻一至焉與君家三徑雖良不侔視他日局局道上時定如何也

古州司戶廳緩齋箴

周必大

戶曹掌州帑廩或行獄訟事皇族公括字仲肅甫官廬陵以緩名齋西清楊公首為之銘而前進士周某又為作箴

蒙莊著書假緩戲儒吟表三年佩玦一夫寓言荒唐亡是子虛孰如經傳衆說之郭薄征緩刑職分司徒議獄

緩死卦畫中孚秦視晉疾和與緩俱上醫命名得無意
乎掾介諸曹盍反三隅勿以朱博嫉齊之舒懼其奮髯
易服走趨當師謝安理髮自如豈為強禦不遲起居勇
義果德抑難此拘能定能應匪亟匪徐官皆有箴敢敬
終初

古詩

送趙英仲司戶

楊廷秀

紹興人物趙戶部身作長城護瓜步佛狸送死緣有人

猿臂不侯得非數只今曾孫戶掾公吏能官政有祖風
南山可搖判難奪東海不寃陰有功吾州尚了本曹印
謁帝明光當得覲秋風正緊送搏扶萬里程塗人莫問

送吉州司戶

黃山谷

吉州司戶官雖小曾屈詩人杜審言今日宣城讀書客
還趨手板傍轅門夏氣涼生土囊口周鼎湯盤見科斗
清風古氣滿眼前乃是戶曹報章還只今書生無此語
已在貞元元和間

律詩

送陳戶曹之官襄陽二首

劉克莊

丞相曾叅督府謀郎君今復贊邊籌彼哉金谷飲長夜
去矣玉關防盛秋尺度豈能拘快士功名端不在中州
習池水滿堤花艷安得相陪賦遠遊

幕府秋風事日生叅軍疋馬去無程起為楚舞何其壯
吟退胡兵在此行且喜峴山碑有跋不愁江表傳無名
老儒能復封侯夢止願躬耕看太平

武學

此下補外集儒學教授之後

歷代沿革唐開元中始置太公尚父廟以留侯張良配
中春中秋上戊祭之牲樂如文宣仍以古名將十人
為十哲配享正元元年尊太公為武成王以白起韓
信諸葛亮李靖李勣列於左張良田穰苴孫武吳起
樂毅列於右以良為配建中初詔考定可配享者列
古今名將六十四人圖形焉並唐書宋大中祥符元年
詔尚父宜加謚昭烈武成王慶歷三年詔置武學于

武成王廟以阮逸為教授八月罷武學以議者言古
名將如諸葛亮羊祜杜預等豈專學孫吳故也熙寧
五年樞密院言古者出師受成於學文武弛張其道
一也祖宗嘗建武學橫議中輟識者悼之欲乞復置
武學以追成先朝之志詔於武成王廟置學紹興十
六年詔脩建武學

古今事實

命去白起

宋建隆二年先是上臨幸武成王廟觀所畫白起曰起
殺已降不武乃命去之

宜升管仲

四年詔曰武成王廟從祀神像齊相管仲宜塑像升于
堂西河太守吳起回畫像降于廡下

以祀孔子

孔子所以祀於學者禮有先聖先師故也自生民以來
未有孔子也豈太公得與之抗衡哉

武學博士 武諭附

歷代沿革宋慶曆三年置學始以阮逸為之宋官制未幾

省熙寧五年樞密院乞復置武學選文武官知兵者

充教授仍差韓縝判武學郭固同判朝臣以上判學績會要武

學教授如國子置直講元豐官制行改為武學博士

教授蔡京就除博士建炎兵興廢紹興十六年詔令臨安府復

修武學二十六年詔武學博士學諭各置一員內博

士於文臣有出身或武舉出身曾預高選人充其學

諭差武學人

中興會要

後又除文臣之有出身者

羣書要語爾惟師屬毋專鞫畧

鄭補之擬制

典教右學

曲阜行武

博制諭導之職

古今事實

訓誘學者

宋武學博士學諭各二人掌以兵書弓馬武藝誘學者

宗學

歷代沿革漢平帝詔朕惟宗室比高帝子孫令置宗師

以糾之致教訓焉明章二帝友愛子弟雖各有自幼者率留京師訓導以禮澹和染教皆為良善唐高祖

詔宗室子孫就秘書外省別為小學

唐儒林傳序

宋胄監

之外復立宗學始創於神宗至崇觀而大備中更禍亂宗學遂廢南渡草創為屋數椽暫寓臨安之睦親宅更化之後以羅仲舒范楷奏請有旨遷睦親宅於他所而盡拓故基以為學焉

古今事實

補員定額

宋南渡更化乃增補員定試額凡陞黜進退之制槩視

太學

宗學題
名記

重廣學舍

嘉定更新宗學置四齋曰貴仁大雅明賢立愛辛巳重
廣學舍添兩齋曰懷德曰升俊

古今文集

雜著

寧宗皇帝御書綾紙贊

宗庠載闢用廣舊規所以昭宗睦廣教育也惟麟趾化
行瓜瓞綿茂雖資稟之攸厚必陶冶而後成俾繇選補
著之于籍月書季放一視賢闕文行相符矩矱是蹈庶
廣收得人之效強我王室尚其茂哉

宗學登科題名記

淳熙甲辰之冬皇上奮發英斷更新大化又明年以麟
趾之胄苦墮肝膽力扶綱常於是赫奕奎文誕錫鬻字

賜之束帛試之春官優之陞擢

宗學博士

宗諭附

歷代沿革宋宗學博士舊諸王宮大小學教授也至道元年太宗將為皇姪等置師傅執政謂環衛之官非親王比當有降乃以教授為名咸平初遂命諸王府官分兼南北宅教授南宮者太祖太宗諸王之子孫處之所謂睦親宅也崇寧五年又改稱某王宮宗子博士位國子博士之上靖康之後宗學遂廢紹興四

年始復置諸王宮大小學教授二員隆興省其一嘉定九年十二月始復置宗學改教授為博士又置宗學諭一員竝隸宗正寺博士在太常博士之下諭在國子正之上俸給賞典依國子博士及正體例於是宗室踈遠者皆得就學而彬彬可觀矣旋有旨復存諸王宮大小學教授一員

羣書要語庶子之正於公族者教之以孝悌睦友子愛明父子之義長幼之序

注正者政也庶子司馬之屬掌國子之倅為政於公族者記文

王世
子

古今事實

追琢宗英

宋寧宗更化之十載聚四方之宗英而追琢之顛隸宗
寺以卿總其要而置博士及諭泣其凡越二年羅仲舒
范楷為是職惠篤有敘程督有經立愛愈周為法亦密

矣
記題名

善屬文為

唐庚字子西善屬文為宗子博士張商英薦其才除提

舉京畿常平

東都
事略

文學知名

王安中字履道自號初寮先生政和中監大名倉以文學知名除宗學博士

官觀部遺

總官觀

歷代沿革宋設祠祿之官以佚老優賢祖宗時員數絕

少官制舊典云祖宗待臣以禮雖年及掛冠未嘗直令致仕皆以宮觀處之假以祿耳熙寧以

後乃增焉是時方經理時政患疲老不任事者廢職

欲悉罷之乃使任宮觀以食其祿時相王安石亦欲

以此處異議者遂詔宮觀毋限員竝差知州人以三

十月為任四朝志

羣書要語式建琳宮除向敏中制養恬真館初寮除劉緯制退安真

館之游殿表類總司靖館夏英公贈王曾詔總使真廷除王曾無會靈觀制

祠庭置使實近闕門荆公答富鄭公詔總琳房之職胡文恭行劉永叔制

領秩真宮

曲阜行劉
奉世制

哲安神館之游

宋
表

脩香火之因

久退安於散地

閒館珍臺獨揖浮丘之袂

灑掃真

祠拜賜散人之號

並同
上

詩句魚書曾替代香火有因緣

劉夢
得詩

莫欺老病未歸身

玉局他年第幾人

東坡送戴蒙
玉局觀詩

古今事實

總祠真館

天聖中除王曾兼玉清昭應宮使總祠真館

有員無職

元豐元年李承之言近年以來內外宮觀約百餘員無
織芥職事虛費廩食不下數萬緡乞今後在京宮觀毋
得過十五員諸路倍之所貴勤勞官守之人有以區別

不虛費國用

會要

古今文集

雜著

論古有職而今甚輕

本朝先未有祠祿但有為某宮某觀使者皆大官帶之
真个是主管本宮本觀御容之屬其他只是監當差遣
雖嘗為諫官亦有為監當者如監場酒務之屬自王介
甫更新法慮天下士大夫議論不合欲一切彈擊罷黜
又恐駭物論於是創為宮觀祠祿以待異議之人然亦
難得惟監司郡守以上眷禮優渥者方得之自郡守以
下則盡送部中與監當差遣後來漸輕今則又輕皆可
以得之矣

朱語
錄

律詩

方寺丞除雲臺觀

劉克莊

河嶽腥膻憤未忘，羨公遙領舊靈光。
草荒太白騎驢跡，雲冷希夷委蛻裳。
定有遺民來獻土，可無散吏去焚香。
吾聞同華多竒觀，不比炎州寂寞鄉。

詩話

暫還復召

張忠簡公闡奉祠陞辭上曰：卿姑暫還，秋涼復召卿公。

既退詩云入請犯天顏今朝出漢闕渾如倦飛鳥日暮

傍巢還

周益公集

在京宮觀

歷代沿革宋舊制以宰相執政充使或丞郎學士以上

充副使兩省或五品以上為判官內侍官或諸司使

副政和改武臣官制以使為大夫以副使為郎為都監又有提點提舉主

管官其戚里近屬及前宰執留京師者多除宮觀以

示優禮之意

四朝志

紹興二十一年在京宮觀依在外

宮祠以三十箇月為任

中興會要又紹興五年詔任在京宮觀請給人從前宰執

依見任減十分之二閣學士已上依六曹侍郎直學士已上依中書舍人太中大夫已上依左右司郎中任樞密都承旨閣學士已上依六曹尚書直學士已上依六曹侍郎太中大夫已上依中書舍人

宮觀使

歷代沿革唐天寶七載以給事中楊釗充九成宮使宮

使之名自此始

南部新書

宋祥符中真宗建玉清昭應宮

王魏公旦為首相始命充使宮觀置使自此始然每

為宰相無職天聖元年呂夷簡為相時朝廷崇奉之

意稍緩因請罷使名

石林燕語

徽宗建玉清萬壽宮乃命

宰執無使副用真廟故事也近以前宰執奉朝請者

領在京官觀使而在外舊相只除提舉宮觀非祖宗

優待宰相之體靖康以來猶未釐正蓋朝廷未暇講

也

官制舊典

政和八年太師魯國公蔡京少傅太宰鄭居

中少保少宰余深檢校太保領樞密院事童貫並無

充神霄玉清萬壽宮使知樞密院事鄧洵武門下侍

郎薛昂中書侍郎白時中尚書左丞王黼宣和殿大

學士蔡攸並無充副使

羣書要語祠庭置使實近闕門

荆公集答
富弼詔

總使真延

王曾

制

古今事實

景靈宮使

明道中錢惟演以使相為景靈宮使又祥符七年宰臣
向敏中為景靈宮使

會靈觀使

祥符九年叅政丁謂充會靈觀使

祥源觀使

天禧五年樞副錢惟演為祥源觀使

醴泉觀使

治平中武康節度李端愿為醴泉觀使

集禧觀使

治平四年富弼以觀文殿大學士充集禧觀使

太一宮使

元祐六年馮京以彰德軍節度使充太一宮使

同醴泉觀使

元祐八年尚書右丞梁燾以疾求罷詔與在京宮使宰相以為故事非宰相不除使遂致同醴泉觀使燾以資

政殿學士充

按元祐六年馮京已除中太一使燾非事始

大觀三年姚雄以

右金吾衛上將軍充使

祐神觀使

大觀元年尚書右僕射趙挺之充祐神觀使

提舉宮觀

歷代沿革宋天聖七年玉清宮災遂罷使而景靈會靈
祥源三宮觀以學士舍人管勾李若谷罷叅政為資
政殿大學士提舉會靈觀自是學士待制知制誥皆
得為提舉晏元獻以舊相提舉萬壽觀武臣李端愿
止得管勾祥源觀今朝官亦云提舉非故事也

古今事實

太乙宮

范鎮字景仁哲宗即位拜端明殿學士提點中太乙宮
無侍讀詔曰西伯善養二老來歸漢室車詞四臣入侍
為我強起無或憚勤公遂辭不起改提舉崇福宮

萬壽宮

元豐元年左藏庫使昌州刺史曹誌為萬壽觀提點元
豐八年龍圖閣待制無侍讀趙彥若為萬壽觀提舉

在外宮觀嶽祠

歷代沿革宋宮觀皆俟力請而後授侍從而上任宮觀

者絕少若因責降改作主管方且差焉熙寧初王安
石相異已者方直除宮觀大抵宮觀非自陳而朝廷
特差者如降黜之例

四朝志

二年詔杭州洞霄宮宅州

明道宮華州雲臺觀建州武夷觀台州崇道觀成都
府玉局觀建昌軍仙都觀江州太平觀洪州玉隆觀
五嶽廟竝依嵩山崇福宮舒州靈仙觀置管勾或提
舉提點官四年詔宮觀岳廟留官一員餘聽如分司
致仕例從便居住六年詔卿監職司以上提舉餘官

管勾當者又詔年六十以上者乃聽差毋過兩任無

用執政恩例者通不得過三任

四朝志

後蔡京用事增

廣職任崇寧三年添宮觀十政和三年添宮觀三

名見

續會要多不錄

選人亦許乞嶽廟宣和王黼用事外開新邊

以熙寧法革之一切不恤士夫於是失祿矣

舊典

古今事實

退處閒局

熙寧六年以莊宅使帶御器械知鎮戎軍張璠為騏驎

使提點鳳祥府太平宮璠有戰功以病請退故以閒局處之

董正治宮

政和二年六月復宮觀縣丞詔在熙寧中先帝董正治官嘗詔宮觀置員縣置丞屬實在乎是所有宮觀縣丞並依大觀三年四月以前指揮

古今文集

律詩

蒙恩監南岳廟

劉克莊

久問嫖姚乞退閒今朝準勅放生還人欺解罷青油幕
帝遣監臨紫蓋山營卒展辭回玉帳林僧講賀到柴關
丈夫不辨封侯事猶要名標處士間



古今事類聚遺集卷十五